



Comunicado di Prensa

20 di october 2023

CAft: "Actua awo pa reforsa finansa publico y economia"

Oranjestad – Economia di Aruba ta creciendo considerablemente desde 2021. Na 2023, segun e ultimo cifranan di Fondo Monetario Internacional (IMF), e economia lo crece cu 8 por ciento. Pa 2024 ta spera un crecimiento di 3 por ciento. E recuperacion fuerte aki, compaña cu medida fiscal, ta traduci den entrada di belasting y di prima substancialmente mas cu lo locual tawata presupuesta. E entradanan inespera ta considerabel, tanto pa pais como pa otro entidad di sector colectivo. Importante ta pa Aruba gara e momentum pa pone finansa publico structuralmente na ordo y haci e economia mas resiliente. Esey por logra door di hiba un maneho presupuestario prudente, uza entrada inespera pa reduci e debe publico (83 por ciento di e PIB na 2023) y hasi inversion cu ta fomenta crecimiento. Reforma structural den salubridad y seguridad social tambe ta aporta na mas resiliencia.

A presenta e proyecto presupuestario pa 2024 na tempo. Esaki ta reforsa derecho presupuestario di Parlamento. Sin embargo, contrario na e ciclo presupuestario, tin retraso pa loke ta trata informacion tocante ehecurion y dunamento di cuenta. Ta premira cu entrada inespera den 2023 lo impulsa e surplus financiero di sector colectivo mucho mas cu e norma di 1 por ciento di e PIB. E posicion financiero ta faborabel riba corto plaso, pero tin riesgonan considerabel. E gastonan di interes, cu ya caba tawata representa 16 por ciento di e presupuesto, lo ta hopi mas cu locual a presupuesta. Esaki ta pa motibu cu e refinanciamiento di e prestamo pa ayudo di likides ta mas caro. Como consecuencia, mas cu nunca e gastonan di interes ta desplasa otro gasto of inversion necesario, y control di gasto ta sigui ta hopi importante. Inversion ta necesario pa haci e economia mas resiliente y aumenta e capacidad pa genera entrada.

Belasting

Aruba a tuma prome bon paso pa haci su sistema fiscal mas robusto cu e Plan Fiscal 2023. Sin embargo, e sistema di belasting indirecto ta keda fragmenta y door di esey innecesariamente compleho. Colegio di supervision financiero di Aruba (CAft) ta sigui encurasha, conforme e Pakete Nacional y e recomendacionnan di IMF, pa simplifica e sistema di belasting indirecto y introduci Impuesto riba Balor Agrega (IBA/btw) riba corto plaso, manera previamente anuncia. Un sistema mas simpel tambe lo beneficia cumplimiento fiscal. Ta importante pa Aruba aumenta cumplimiento fiscal pa garantiza un distribucion di carga mas ekilibra y asina ei crea espacio presupuestario adicional pa mas inversion cu ta fomenta crecimiento.

Cuido di salud y seguridad social

Door di desaroyo demografico, si no cambia maneho, e gastonan di cuidado y pensioen di behes lo sigui aumenta, locual lo genera deficit den futuro. Pa controla gasto den cuidado di salud, Algemene Ziekttekosten Verzekering (AZV) ta considerando un marco di gasto. En principio, CAft ta na favor di un marco di gasto, di forma cu ora economia ta bayendo bon por acumula e surplusnan y esey por sirbi como reserva durante contratiempo economico. Sin embargo, ta importante cu e marco di gasto no ta demasiado amplio y cu ta



aplica esaki solamente pa contene crecemento di gasto di cuidu di salud. Hustamente awo cu tin surplus enorme, CAft ta recomenda pa tuma medida, pa cuidu di salud y seguridad social por sigui ta pagabel pa e generacionnan futuro.

[Fin di e Comunicado di Prensa]

Fotografo:

Eric Boeldak

Texto na potret:

Ta spera ku den 2023 lo tin un surplus financiero di sector colectivo mucho mas cu e norma di 1 por ciento di e PIB.

Nota pa redaccion – no pa publicacion

Persona di contacto na Cft:

Secretariado di Colegio di supervision financiero di Aruba
Telefon +5999 461-9081
Email info@cft.cw
Internet www.cft.cw

Persona di contacto cu Prensa:

Jefka Alberto
Telefon +5999 512-6861